



Lus Qhia rau Cov Niam Qhuav Txiv Qhuav **INFORMATION FOR FOSTER PARENTS**

**Ntsuam xyuas kev nyob kaj huv tom qab muaj tus qhia tias muaj
kev tsim txom los yog tsis saib tsis xyuas me nyuam hauv koj
lub tsev ua niam qhuav txiv qhuav**



**Muaj dab tsi tshwm sim yog tias muaj ib qhov liam rau kuv
tias muaj kev tsim txom los yog tsis saib tsis xyuas?**

Ib qhov mus ntsuam xyuas tias tsam muaj kev tsim txom los yog tsis saib tsis xyuas hauv ib lub tsev muaj niam qhuav txiv qhuav pab tu (foster home) yog pib thaum muaj neeg hu qhia rau Division of Milwaukee Child Protective Services (DMCPS) tus xov tooj (414) 220-SAFE hais tias nws ntseeg tias muaj ib tug me nyuam raug neeg tsim txom los yog tsis saib tsis xyuas. Yog pom tias qhov qhia paub muaj raws li lo lus txhais raws cai ntawm kev tsim txom los yog tsis saib tsis xyuas, yuav muab qhov qhia paub ntawd sau cia zoo thiab muab txoj hauj lwm rau DMCPS ib tug Kws Ntsuam Xyuas (Initial Assessment specialist) uas yuav mus xyuas qhov kev nyob kaj huv tam sid ntawm tus me nyuam.

DMCPS tus neeg ua hauj lwm yuav tham nrog tus me nyuam thiab mus saib lub tsev niam qhuav txiv qhuav los mus tham nrog cov neeg hauv tsev neeg thiab lwm cov uas tej zaum yuav paub txog qhov liam tias muaj kev tsim txom ntawd. Nyob ntawm seb qhov teeb meem ntawd mus li cas, tej zaum tus neeg ua hauj lwm yuav coj tus me nyuam mus kuaj. Yuav muab tus me nyuam tshem tawm ntawm lub tsev mus yog tus neeg ua hauj lwm pom tias tsis muaj kev kaj huv rau tus me nyuam.

Tsis dhau peb hnuv tom qab muab tsab xov tooj hu tuaj sau cia, ib qhov chaw khiav hauj lwm tsis zwm rau leej twg yuav pib ua nws qhov ntsuam xyuas thiab. Qhov no yog los mus txiav txim xyuas seb muaj kev tsim txom los tsis muaj. Tus neeg no yuav mus xam phaj tus me nyuam uas muab tso nrog niam qhuav txiv qhuav nyob, cov neeg hauv tsev neeg, thiab lwm tus. Qhov chaw khiav hauj lwm tsis zwm rau leej twg muaj sij hawm ntev txog 60 hnuv los mus ua kom tiav nws qhov ntsuam xyuas thiab xyuas tias qhov liam tias tsim txom me nyuam ntawd puas muaj tseeb los tsis tseeb, uas txhais tau tias qhov tau ua tshwm sim ntawd puas yog los yog tsis yog raws li lo lus txhais raws cai ntawm kev tsim txom los yog tsis saib tsis xyuas me nyuam. DMCPS siv ib qhov chaw khiav hauj lwm tsis zwm rau leej twg li no los mus ua qhov ntsuam xyuas kom ntseeg tau tias nws tsis muaj qhov kev cov nyom ntawm siab xav tau (conflict of interest) ntawm cov niam qhuav txiv qhuav thiab DMCPS.

Cov tsev niam qhuav txiv qhuav yuav raug muab tso rau qhov “nyob tos” thaum lub sij hawm ua qhov kev ntsuam xyuas. Koj yuav tau txais ib tsab ntawv tuaj ntawm qhov chaw khiav hauj lwm uas muab ntawv tso cai rau koj hais txog qhov muab tso nyob tos ntawd seb yog li cas. Qhov no txhais hais tias yuav tsis muaj cov me nyuam tuaj tshiab tso nrog koj nyob kom txog rau thaum muab qhov kev ntsuam xyuas ua tiav tas.

Dab tsi uas cov niam qhuav txiv qhuav yuav ua tau los mus pab kom qhov kev ntsuam xyuas mus tau sai?

Cov niam qhuav txiv qhuav thiab tus me nyuam thiab lwm cov neeg hauv lub tsev yuav tsum muaj sij hawm tham nrog tus neeg khiav hauj lwm. Ua siab dawb paub teb cov lus nug yog ib qhov tseem ceeb thiab ua kom qhov kev ntsuam xyuas mus tau lawm tom ntej.

Muaj dab tsi tshwm sim tom qab muaj ib qho txiav txim?

Qhov chaw khiav hauj lwm muab ntawv tso cai yuav tau txais ib daim qauv ntawm daim ntawv sau txog qhov kev ntsuam xyuas thiab yuav muab los saib kom zoo. Yog daim ntawv hais tias kev tsim txom los yog tsis saib tsis xyuas tus me nyuam yeej muaj tseeb, nws yuav muaj teeb meem rau koj daim ntawv tso cai ua niam qhuav txiv qhuav. Yuav qhia rau koj paub seb yuav muaj dab tsi tshwm sim tom ntej thiab yuav hais kom muab qhov tau txiav txim ntawd los xyuas dua li cas.

Tab txawm qhov tau liam ntawd tsis muaj tseeb, nws kuj tseem yuav ua rau qhov muab me nyuam tso rau hauv koj lub tsev los yog qhov rov xyuas muab daim ntawv tso cai tshiab rau koj muaj teeb meem. Thov to taub thiab BMCW thiab nws cov khub khiav hauj lwm yuav tsum ua txhua yam kom ntseeg tau tias cov me nyuam uas muab tso nrog niam qhuav txiv qhuav pab tu muaj kev kaj huv thiab noj qab nyob zoo. Qhov no txhais tau tias kom tej kev yuav ua tau teeb meem tsis muaj kev kaj huv rau me nyuam muaj tsawg.

Dab tsi uas kuv yuav ua tau kom me nyuam muaj kev kaj huv nyob hauv kuv lub tsev?

Kawm kom paub thiab ua raws nraim kev ua niam qhuav txiv qhuav pab tu me nyuam cov cai tswj thiab cov cai kav. Nco ntsoov ua kom raws txoj cai tswj uas tsis pub siv qhov ntaus me nyuam ua ib qho kev qhuab qhia. Nug thiab nrhiav kev pab yog tus me nyuam muab tso nrog koj nyob coj ib tus cwj pwm muaj teeb meem.

Nco ntsoov ua kom ntseeg tau tias muaj kev saib xyuas tus me nyuam phim li nws lub hnuv nyoog.

Kom txhua tus me nyuam muab tso rau hauv koj lub tsev mus kuaj nws lub cev rau ntawm Child Protection Center tsis pub dhau tsib (5) hnuv suav txij hnuv tau hais muab tus me nyuam rau koj saib yog hais tias koj lub tsev yog qhov chaw xub muab tus me nyuam tso rau hauv. Koj yuav tau txais ntaub ntawv qhia paub hais txog qhov teem sij hawm mus ntsib no. Nyob rau ntawm qhov kuaj xyuas lub cev no, tus kws kho mob yuav teev txhua qhov uas raug mob rau tus me nyuam, thiab seb yuav coj mus kho li cas.

Kuv yuav hu rau leej twg yog kuv muaj lus nug thaum lub sij hawm ua qhov kev ntsuam xyuas?

Tus neeg ua hauj lwm tswj xyuas tus me nyuam (case manager) los yog tus kws paub txog ntawv tso cai yuav teb tau koj cov lus nug hais txog qhov kev ntsuam xyuas thiab seb nws yuav muaj teeb meem li cas rau qhov muab me nyuam tso rau hauv koj lub tsev thiab koj daim ntawv tso cai.

DCF yog ib tus tswv hauj lwm thiab ib qhov chaw muab kev pab cuam muaj vaj huam sib luag rau sawv daws. Yog koj muaj ib tus mob xiam oob qhab tsis taus thiab xav tau cov ntaub ntawv no ua lwm hom kom koj nyeem tau, los yog kom muab txhais ua lwm hom lus, thov hu rau (414) 343-5500 los yog 711 TTY.

Muaj lus nug txog neeg cov cai hu rau (608) 422-6889 los yog
711 TTY (Hu Dawb).